

Phawuloosi Filphisiyuusa

Asaas

Xaafida Kiitaa

Gaatha Qofaa

Phawuloosi Filphisiyuusa asaas xaafida kiitay xaafettiday, Roome biittan Maqedooniya awurajjan, Filphisiyuusa biittan de7iya woosa keethaassa. He woosa keethay Phawuloosi Awuroppa biittan koyro essida woosa keethi. Ha kiitay xaafettiday, Phawuloosi qasho keethan de7iya wode hara ammaniyaa oosanchchoti iya ixxida wodenne Filphisiyuusa woosa keethan denddida worddo timirttiya gaason iya wozanay daro azzanida wode. Gidoshin, Phawuloosi Yesuus Kiristtoosa minthidi ammaniyaa gisho ha kiitan qonccidi benttey, ufayssinne kumetha ammanetethi. Filphisiyuusan de7iya daro asay Roomeppe di7ettidi yida asi. Entti Roome biittaas mishettoosonanne loythi naagoosona. Enttafe issoti issoti ammanidi bantta biitta asan goodettidosona. He gooday entta bolla metonne manqotethi ehis (Ha@O 16:20-21).

Phawuloosi ha kiitaa xaafida koyro gaasoy iya metuwa wode iya maaddanaw Filphisiyuusa ammaniyaa asay imota iyaw yeddida gisho, entta galatanaassa. Iya bollanne entta bolla dumma dumma metoy gakkidabaa gidikkoka entti minnettana melanne kumethi ammanet-tidi daana mela ha demmida injjiyan entta minthethees. Ceeqonne otero aggidi, Yesuus

Kiristtoosa ashkketethan entti kumana mela minthidi entta akeekisees. Yesuus Kiristtoosara issife gidon entti demmida de7oy Xoossaa aadho keehatethaafe pulitidayssanne ammanon entti ekkidayssafe attin Ayhudeta wogaa polon benttidabaa gidonnayssa entta akeekisees. Yesuus Kiristtoosara issife de7iya ubbaas Xoossay immiya saruwanne ufayssaa enttaw xaafees.

Ha kiitay eretty ufayssi, ammanetethi, is-sifetethinne ammanon minnidi de7o qonccisidi besseyssana. Hessa bolla gujjidi, Phawuloosi Filphisiyuusa woosa keethaa siiqiya gita siiquwa qonccisees.

Filphisiyuusa kiitaa ayfe qofata

Gelo qofaa 1:1-11

Phawuloosi hanidi de7iya duussaa 1:12-26

Ammanon leemiso de7o 1:27-2:18

Ximotiyoosasinne Ephphaafiraditus de7iya qofaa 2:19-30

Morkketappenne iitatappe naagetethi 3:1-4:9

Phawuloosanne Filphisiyuusa ammaniyaasaa 4:10-20

Sarothonne anjjo 4:21-23

¹ Kiristtoos Yesuusara issifida gisho, Xoossabaa gidida, Filphisiyuusa kataman de7iya woosa keethaa cimatasinne daaqoneta ubbaas. Yesuus Kiristtoosa ayye gidida, Phawuloosappenne Ximotiyoosappe kiitettida kiitaa.

² Nu Aawa Xoossaafenne Godaa Yesuus Kiristtoosappe aadho keehatethayenne sarotethay hintew gido.

Phawuloosa galata woosaa

³ Taani hinttena qoppiya wode ubban, ta Xoossaa galatays. ⁴ Taani hintte ubbaas Xoossaa woossiya wode ufayssan woossays. ⁵ Hintte koyro gallasappe ha77i gakkanaw, Wonggelaa markkateyssen taara issife gididi, tana maaddida gisho, Xoossaa galatays. ⁶ Hintte gidдон lo77o ooso doomida Xoossay, Kiristtoos Yesuusi simmiya gallasay gakkanaw, polanayssa erays.

⁷ Hintte ubba wode ta wozanan de7eeta. Taani ubba wodekka hessada qoppanaw bessees. Ha77i taani qashon de7ashenne qashettanaappe sinthe Wonggelaa naagoninne Wonggelaa mintha eson Xoossay taw qaadida qaadaa hintteka taara shaakettideta. ⁸ Taani hinttena ubbaa Kiristtoos Yesuusa siiquwan ay mela laamotiyakko Xoossay taw markka.

⁹ Hintte siiqoy tuma eratetharanne akeekara issife gujji gujji diccana mela Xoossaa woossays. ¹⁰ Hessian hintte lo77obaa shaakkidi, dooreyssata, Kiristtoosi simmiya gallasan geeshshatanne borettonnayssata gidana. ¹¹ Hintte de7oy Xoossaa bonchchuwasinne galatas Yesuus Kiristtoosa baggara benttiya xillotethaa ayfiyaan kumidi ayfana.

Phawuloosa qashetethay Wonggelay dalggana mela maaddis

¹² Ta ishato, tana gakkida ubbay Wonggelay dalggana mela tuma maaddidayssa hintte erana mela koyays. ¹³ Taani Kiristtoosa gisho qashettidayssa, kawo keethaa naageyssatinne

hayssan de7iya harati ubbay eroosona. ¹⁴ Ta qashuwa gaason nu ishatappe daroti Godan keehi ammanettidosona. Hessa gisho, Xoossaa qaala yashshi baynna kaseyssafe aadhdhi min-nidi odana mela minotethi demmidosona.

¹⁵ Gidoshin, issoti issoti qanaateninne palaman Kiristtoosabaa odoosona, shin harati suure wozanappe odoosona. ¹⁶ Suure wozanappe odeyssati, Xoossay taw Wonggelaa naago ooso immidayssa eriya gisho, siiqon odoosona. ¹⁷ Shin tana qanaateyssati ta qashuwa bolla hara meto ehanabaa enttaw daanin banttana dosidi Kiristtoosabaa odoosonappe attin tuma wozanappe odokkona.

¹⁸ Hessi aykkoka metenna. Tuma ogen gidin woykko worddo ogen gidin he ubban Kiristtoosi sabbakettes. Tana hessi ufayssees. Qassi harabay tana ufayssiyabay, ¹⁹ taani hintte woosaninne Yesuus Kiristtoosa Ayyaana maaduan attanayssa eriya gisho tana ufayssees. ²⁰ Ta gita amoyenne ufayssan naagiya naagoy ta yeellatonna attanayssa. Shin ubba wode ootheyssada, ha77ika taani paxa de7in woykko hayqqin yayyonna ta kumetha asatethan Kiristtoosi bonchchettana gada minotethan odays. ²¹ Ta de7ikkoka Kiristtoosa xalaalas de7ays; qassi ta hayqqikokka taw aadhdhida wodhe. ²² Shin ta paxa de7ikko ayfey de7iya ooso oothana. Shin paxa de7eyssafenne hayqoppe awussa dooranekko taw erettenna. ²³ Taani ha nam77atappe awussa dooranekko un77ettas. Ha de7uwappe shaakettada Kiristtoosara issife

daanaw amottays; Kiristtoosara issife de7eyssi ubbaafe aadhdhida lo77o. ²⁴ Shin taani hintte gisho paxa de7eyssi hinttew daro koshshiyabaa.

²⁵ Hessa taani geeshshada erays; taani, hintte ammanon diccanaadanne ufayttanaada hinttera paxa daana. ²⁶ Hessa gisho, taani hintteko simmada yaa wode, Kiristtoos Yesuusara hintte

de7iya de7uwan tanan de7iya ceeqetethay hinttew darana.

²⁷ Ubbaafe aathidi, hintte Kiristtoosa Wonggelaas bonchcho ehiya de7o de7ite. Ta hinttena be7in woykko be7onna ixxin hintte issi qofan minnidi eqqidi, harati Wonggelaan ammana mela issi wozanan gididi issife baaxeteysa si7ana. ²⁸ Hintte morkketas yayyofite. Entti hinttera eqettiyaba gidikko hessi hinttew atatethaas, enttaw dhayos Xoossaafe gidida malla. ²⁹ Kiristtoosas oothiya qaaday hinttew

imettiday, hintte iya ammanana mela xalaala gidonnashin hintte iya gisho meto ekkana melassa. ³⁰ Hessa gisho, hintte ta waayiya kase be7ideta; ha77ika ta waayetteysa si7eeta. Hintteka ta waayiya mela waayetteta.

2

Tuma ashkketethi

¹ Kiristtoosan hintte de7iya de7oy hinttena minthees; qassi iya siiqoykka hinttena minthethees. Geeshsha Ayyaanaara hinttew issifetethi de7ees; hintte haratas keehetanne qadhetteeta. ² Hiza, hintte issi qofan, siiqon, issi

wozananinne ayyaanan issino gididi tana polo u fayssite. ³ Hinttena doson woykko ceeqettiya hada amon issibaakka oothofite. Shin hintte issoy issuwafe gitatays yaagidi qopponna hinttena kawushshite. ⁴ Hintte issoy issoy, hara asi maaddiyabaa koyiteppe attin hinttena maaddiyabaa xalaala koyoppite.

⁵ Kiristtoos Yesuusan de7iya qofay hinttenan daanaw bessees.

⁶ Iyaw ubba wode Xoossaa hanotethi de7ees.

Yaaniya gisho, iya Xoossara issino oothiya hanotaa,
wolqqan ekkanaw koyibeenna.

⁷ Gidoshin, I baw de7iya bonchchuwa ubbaa aggidi,

aylle medheta ekkis;
ase daanidi qonccis.

⁸ I bana kawushshis;

hayqqana gakkanaw,
hari attoshin masqaliya bolla
hayqqanaw kiitettis.

⁹ Hessa gisho, Xoossay iya daro dhoqqu dhoqqu oothis;

qassi suntha ubbaafekka aadhdhiya dhoqqa
sunthaa immis.

¹⁰ Saloninne sa7an,

sa7appe garssan de7iya ubbay,
Yesuusa sunthaa bonchchuwas gulbbatana.

¹¹ Asa ubbay bantta inxarssan,

Yesuus Kiristtoosa Goda yaagidi,
Xoossaa Aawa bonchchuwas markkattana.

Ha alamiyas poo7o gido

¹² Ta ishato, taani hinttera de7iya wode ubban hintte kiitettidayssada, ha77i taani hintte matappe haakkinkka, kaseyssafe aathidi, kiitettanaw bessees. Xoossaas yashshaninne kokkorssan hintte atotethaa polanaw oothite. ¹³ Xoossay, hintte iyaw ero gidi kiitettana mela ubba wode hintte gidдон oothees.

¹⁴ Ay ooso oothishekka zuuzummonna woykko palamonna oothite. ¹⁵ Geellanne nagaranchcho asaa gidдон borettonnayssata, geeshshatanne pokkoy baynna Xoossaa naytada gidite. Hintte entta gidдон salo xoolinttoda poo7ishe, ¹⁶ de7o immiya kiitaa enttaw odite. He wode ta daaburissaynne ta oosoy mela attiboonna gisho, Kiristtoosa yaa gallas ta hinttenan ceeqettana.

¹⁷ Hintte Xoossaas immiya ammano imotaa bolla ta suuthay ushsha yarshshoda * gukkikokka tana ufayssees. Hintteka taara ufayttana. ¹⁸ Hessada hintteka ufayttidi tanakka ufayssanaw bessees.

Ximotiyooosanne Ephphaafiraditusa

¹⁹ Taani hintte de7uwabaa si7ada ufayttanaw Ximotiyooosa hintteko ellesada yeddana mela Godaa Yesuusi tana maaddanayssa ammanettays. ²⁰ Hintte de7uwas wozanappe qoppiya iya mela asi hari oonikka baawa. ²¹ Harati banttana go77iyabaa koyoosonappe attin Yesuus Kiristtoosi koyabaa oothokona. ²² I taara issife

2:15 2:15 Zaare 32:5 * **2:17** 2:17 Ta suuthay ushsha yarshshoda: Issi issi wode yarshsho bessan yarshshettiya mehe yarshshuwa bolla haathe woykko woynе ushshay gukkees.

gididi na7i ba aawas oothayssada Wonggela ooso oothidayssanne ammanettiya asi gideyssa hintte ereeta. ²³ Hessa gisho, tabay haniyabaa be7ada ellesada iya hintteko yeddana gada qoppays. ²⁴ Taani, ta huu7en mata woden hintteko baanayssa Godan ammanettays.

²⁵ Hessadakka, taani, ta ishaa Ephphaafiroditusa, taara issife ta bagga gididi oothidayssa, olettidayssanne, tana maaddanaw hinttew kiittidayssa, hintteko kiittanaw qoppas. ²⁶ I hinttena ubbaa be7anaw daro laamotees. Qassi I harggettidayssa hintte si7ida gisho, ba wozanan daro un77ettis. ²⁷ I tuma harggettidi, hayqqi kichchidi attis. Shin Xoossay iyaw qadhettis. Iya xalaalas gidonnashin, azzanaoy azzano bolla guzhettonnaada, tawukka qadhettis.

²⁸ Hiza, hintte iya zaari be7idi ufayttanaada tawukka ta wozanaa seelay irxxanaada taani iya ellesada hintteko yeddana amottays. ²⁹ Godaas haggaaziya asada iya kumetha ufayssan mukkite. Qassi iya mela asa ubbaaka bonchchite. ³⁰ Hintte ta matan gididi oothanaw danda7onna maaddiya maaddidi Kiristtoosa oosuwa gisho, ba shemppuwas mishettonna ixixidi hayqqi kichchidi attis.

3

Tuma xillotethaa

¹ Wurssethan, ta ishato, hintte Godaaba gidinya gisho, ufayttite. Taani kase xaafidayssa zaarada xaafanayssi tana waaysenna, shin hinttena balappe naagana.

² Iitabaa oothiya kanatappe, qassi qaxxaret-tanaw koshshees giya iita asatappe naagetite. ³ Nuuni Xoossaa Geeshsha Ayyaanan Xoossaas goynniya gishonne nu de7uwan Kiristtoos Yesu-usan ceeqettiya gisho, tuma qaxxaro qaxxaretti-daysata. Nuuni kare asatethaa bolla oosettiya-ban ceeqettoko.

⁴ Ta kare asatethan ceeqettanaw koshshiko ta daroban ceeqettanaw dandda7ays. Ay asikka ba kare asatethan ceeqettiyabay baw de7ees gidi qoppiko, taani iyappe daro aadhdhada ceeqet-tiyabay de7ees. ⁵ Taani yelettida saamintara qaxxarettas. Taani yeletan Isra7eele; taani Biniyame zare; taani walaki baynna Ayhude ase. Ayhude higge naagon gidikko taani Farisaawe. ⁶ Ayhude ammanuwas mishetethan gidikko taani woosa keethaa yedethas. Issi asi higge naagidi xilliyaba gidikko, tanan borey benttibeenna.

⁷ Shin kase tana maaddees gada qoppidabaa ubbaa, Kiristtoosa gisho gada maaddonnabaa oothada taybas. ⁸ Hessa xalaala gidonnashin, taani ta Godaa Kiristtoos Yesuusa ereyssi haraba ubbaafe daro aadhdhiya gisho, he ubbaa wod-hey baynnabaada taybas. Taani iya gisho ubbabaa dhayas. Kiristtoosa demmanaw ub-babaa wora holettida buureda taybays. Taani Yesuusara issino gidas. ⁹ Taani higgess kii-tet-tada demmiya ta huu7e xillotethi taw baawa. Kiristtoosa ammanin benttiya xillotethay, Xoos-saa matappe yaa xillotethay ha77i taw de7ees.

¹⁰ Taani Kiristtoosanne iya denddo wolqqaa er-anaw koyays. Taani iya metuwa iyara shaaket-tanawunne iya hayquwan iya daananaw amot-tays. ¹¹ Hessadakka, hayqoppe denddada meri-naw de7on daanayssa ufayssi oothays.

Gaxa gakkanaw woxxite

¹² Taani ha77i gaxa gakkas woykko tanan bali baawa giikke. Shin Kiristtoos Yesuusi tana oykkida gisho taani ta sinthan de7iya woytuwa oykkanaw woxxaysinne butetays. ¹³ Ta ishato, taani hessa demmas gada qoppike, shin taani issibaa oothays. Taappe guvera de7eyssa dogada sinthan de7eyssa oykkanaw zaaturays. ¹⁴ Hessa gisho, taani gaxa gakkanaw woxxays. Xoossay Kiristtoos Yesuusa baggara salo de7uwas xeevida woytuwa ekkaw daaburays.

¹⁵ Hiza, nuuni Ayyaanan gashtida ubbay hessa qoppaw bessees. Hinttefe baggatas dummat-tiya qofi de7ikko, hessaka Xoossay hinttew qon-cisana. ¹⁶ Gidikkoka, nuuni hanno gakkanaw de7ida de7uwan, ane sinthe boos.

¹⁷ Ta ishato, tana daanite; hessadakka, nu leemisuwa kaalliya asata akeekidi be7ite. ¹⁸ Taani hessa hinttew kase daro toho odas, shin ha77ika zaarada afuthan odays. Kiristtoosi masqaliya bolla hayqqidayssas banttana morkke oothida daro asati de7oosona. ¹⁹ Entta wursethay dhayo; entta uloy enttaw xoosse. Yeellatanaw bessiyaban entti ceeqettoosona; qassi ha sa7abaa xalaala qoppoosona. ²⁰ Nu biittay saluwana. Saloppe yidi nuna ashshiya

Godaa Yesuus Kiristtoosa naagoos. ²¹ Kiristtoosi ubbabaa ba maatappe garssan oothanaw dandda7iya ba wolqqan nu daaburanchcho asatethaa laammidi ba bonchcho asatethaa daanisana.

4

Wurssetha zore

¹ Ta ishato, ta doseyssato, ta laamoteyssato, tana ufaysseyssato, tana gitayeysato hiza Godan minnidi eqqite.

² Ewoodinne Sinxiika, hintte nam77ay, issi qofan michchida Godan daanada taani hinttena zorays. ³ Taara oothiya ammantheysso, neeni ha maccasata maaddana mela ta nena woosays. Ha maccasati taara, Qeleminxoosaranne entta sunthay Xoossaa de7o maxaafan xaafettida haratara issife Wonggelaa ubba bessaa gathanaw daaburidosona.

⁴ Godaara hintte de7iya de7uwan ubba wode ufayttite. Taani hessa gujjadakka odays; ufayttite.

⁵ Asa ubbay hintte ashkktethaa ero; Goday matan yaana. ⁶ Xoossaa hintte woossiya wode ubban iya galatishe, hinttena koshshiyaba ubbaas woossiteppe attin aybibaaskka hirggofite. ⁷ Asa eratetha ubbaafe aadhdiya Xoossaa sarotethay, hintte wozanaanne hintte qofaa Godaa Yesuus Kiristtoosa baggara naagana.

⁸ Wurssethan, ta ishato, hintte wozanan lo77obaanne galatisiyabaa qoppite. Tuma gidiyabaa ubbaa, bonchchoba ubbaa, qoho gidonnaba ubbaa, geeshshaba ubbaa, siiqobaa

ubbaanne ufayssiyaba ubbaa qoppite. ⁹ Hintte taappe tamaaridabaa, ekkidabaa, si7idabaaanne be7idabaa ubbaa oothite. Sarotethaa immiya Xoossay hinttera issife gidana.

Phawuloosi imettida imotaas galatis

¹⁰ Daro wodeppe guye, hintte tabaa zaaridi qoppanaw doomida gisho taani Godan daro ufayttays. Hessa guussay, taw qoppanaw hintte w injjetonna ixxidaysafe attin taw qofaa ag-gibeeketa. ¹¹ Taani hessa tana metida gisho giikke; taw de7iyabay gidana guussu tamaaras. ¹² Taani metootettidi de7iya duussi erays; qassi durettidi de7iya duussika erays. Awun gidin qassi ay wodekka taani kalonne kosha, pacenne palaha tamaaras. ¹³ Kiristtoosi taw immiya wolqqan ubbabaa oothanaw dandda7ays.

¹⁴ Gidikokoka, hintte ta metuwa taara ekki-dayssan lo77o oothideta. ¹⁵ Filphisiyuusa asato, Wonggelaa koyro odanaw taani Maqedooniyappe keyaa wode immiyabankka ekkiyabankka hintte woosa keethaafe attin hari tana maaddiboonaayssa hintte ereeta. ¹⁶ Tana Teselongen metoy gakkida wodekka tana zaari zaaridi maaddideta. ¹⁷ Taani, hinttefe imota ekkanaaw koyada gidonnashin, imoppe yaa anjuuwaa hintte ekkana melassa.

¹⁸ Taani, hintte immida ubbaanne gididi palaheyya ekkas. Hintte yeddida ubbaa Ephphaafiraditusappe ekkas; koshshiyaba ubbay taw de7ees. Hintte taw yeddida imoy Xoossaas sawo tonggu giya, I dosiya, I ufayttiya

yarshsho mela. ¹⁹ Ta Xoossay ba bonchcho duretethaafe, Kiristtoos Yesuusa baggara hinttew koshshiyaba ubbaa immana. ²⁰ Nu Aawa Xoos-saas merinaappe merinaa gakkanaw bonchchoy gido. Amin7i.

Wurssetha sarotaa

²¹ Kiristtoos Yesuusa baggara Xoossabaa gidida ubbaa saro giite. Taara de7iya ishata hinttena saro goosona. ²² Xoossabaa gidida asa ub-bay, ubbaafe aathidi Kawuwa Qeesare keethan de7eyssati hinttena saro goosona.

²³ Godaa Yesuus Kiristtoosa aadho keehatethay hinttera gido.

Gofa New Testament
The New Testament in the Gofa language of Ethiopia
copyright © 2011-2013 The Word for the World International

Language: Goofa (Gofa)

Contributor: The Word for the World International

Gofa New Testament

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-09

PDF generated using Haiola and XeLaTeX on 21 Feb 2024 from source files dated 9 Apr 2023

2b490744-ed38-524a-bfa5-b34b759dbbca